

ეროვნული ეკონომიკის უმნიშვნელოვანესი გამოწვევა - მეტი აქცენტი განვითარებაზე

ემზარ ჯულაკიძე

აკაკი წერეთლის სახელმწიფო

უნივერსიტეტის პროფესორი

Emzar.julakidze@atsu.edu.ge

ტენგიზ კუპრაშვილი

აკაკი წერეთლის სახელმწიფო

უნივერსიტეტი ასოც. პროფესორი

Tengiz.kuprashvili@atsu.edu.ge

THE MOST IMPORTANT CHALLENGE OF THE NATIONAL ECONOMY - MORE EMPHASIS ON DEVELOPMENT

Emzar Julakidze

Akaki Tsereteli State University professor

Emzar.julakidze@atsu.edu.ge

Tengiz Kuprashvili

Akaki Tsereteli State University Assoc. Professor

Tengiz.kuprashvili@atsu.edu.ge

RESUME

At all levels of government and business management, there appears to be a lack of strategic vision. It's important to note that success cannot be achieved by focusing solely on problems; development requires careful attention and can only be achieved through effective management. A successful government official is one who prioritizes the realization of the country's future goals and the strategy for achieving them, in addition to addressing existing issues. Similarly, many national businesses face a similar situation. Strengthening a company's ability to function in the long term is the first step towards achieving success. This, however, is dependent on the manager's desire and competence. Nonetheless, research conducted on this issue suggests that the main obstacle to national business development is the lack of management skills.

Key words: economic challenges, strategic vision, successful management, management deficit.

* * * *

ყველა იმ ეკონომიკურ პრობლემას, რომლის დაძლევა ცხოვრების დონის ამაღლებას უკავშირდება თავისებური გამოვლენა აქვს და ბუნებრივია, შესაბამის კვლევას საჭიროებს. თუმცა, რაც ასეთ პრობლემებს აერთიანებს, განსაკუთრებით კი ჩვენს ქვეყანაში, არის ის რომ საქმე გვაქვს სტრატეგიული აზროვნების მკვეთრ დეფიციტთან. სტრატეგიული ხედვის დეფიციტია როგორც სახელმწიფო მართვის, ასევე ბიზნესის მართვის ყველა დონეზე.

არადა, შეუძლებელია მიაღწიო წარმატებას მხოლოდ მიმდინარე პრობლემებზე ორიენტირებით; საჭიროა როგორც ქვეყნისა და მისი ცალკეული რეგიონის, ასევე ეროვნული ბიზნესის პრიორიტეტების განსაზღვრა, მოსალოდნელ ცვლილებებზე ორიენტირება, ახალი შესაძლებლობის ძიება, რაც ფაქტობრივად, არა მარტო არსებული პრობლემების აღმოფხვრას, არამედ მოსალოდნელი პრობლემებიდან დაზღვევასაც გულისხმობს. სხვა სიტყვებით რომ ვთქვათ, თანამედროვე საფინანსო, ეკონომიკური, ფულად-საკრედიტო, პოლიტიკური თუ დემოგრაფიული პრობლემების პირობებში ქვეყნის ხელისუფალთა და ბიზნეს-მენეჯერთა უმნიშვნელოვანესი გამოწვევა, მიმდინარე პრობლემების აღმოფხვრის პარალელურად, უნდა იყოს ზრუნვა სამართავი სოციალურ-ეკონომიკური სისტემის სამომავლო პოზიციების გაუმჯობესებაზე, განვითარების სწორი სტრატეგიის შემუშავებაზე, რაც მხოლოდ წარმატებული მენეჯმენტით მიიღწევა.

რამდენიმე სიტყვით, ჯერ სახელმწიფო მენეჯმენტის უმნიშვნელოვანეს გამოწვევასა და შემდგომ კი ბიზნეს-მენეჯმენტში არსებულ პრობლემებსა და გამოწვევებზე. თამამად შეიძლება ითქვას, რომ დღეს სახელმწიფო მენეჯმენტი მოქმედებს პრინციპით - „მხოლოდ მოჭრიალე ბორბალი საჭიროებს შეკეთებას“. ბუნებრივია, მასში არის ჩვენი „საბჭოური გამოცდილება“. საქმე იმაშია, რომ სამათეულ წელზე მეტი გავიდა მას შემდეგ, რაც საქართველო მკვეთრად დაადგა საბაზრო ეკონომიკის გზას და მაინც ბევრი მინისტრი, მხარის გუბერნატორი, მუნიციპალიტეტის მერი, სახელმწიფო შპს-ს დირექტორი და არც თუ ისე იშვიათად იმ სააქციო საზოგადოებათა მენეჯერები, რომელშიც სახელმწიფოს ჯერ კიდევ აქვს გარკვეული წილი, მხოლოდ მისი მოლოდინში არიან თუ რას დაავალდებენ ზემოდან, რადგან თვლიან, რომ მისი საქმიანობის შეფასება და მეტიც, მისი როგორც პიროვნების „კარიერული წინსვლა და წარმატება“ ზემდგომის მიერ მიღებული გადაწყვეტილებების პრაქტიკულ განხორციელებაში გამოიხატება. ანუ, მათი აზრით „კარგი მენეჯერობისათვის“ საკმარისია იყო კარგი შემსრულებელი. არადა, მენეჯმენტი წარმატებუ-

ლია მხოლოდ მაშინ, როდესაც ხელმძღვანელი თვითონ ირჩევს როგორც განვითარების საკუთარ ორიენტირს (სტრატეგიულ მიზანს), ასევე მისი მიღწევის გზებსა და საშუალებებს. ანუ, წარმატებულია ის ხელმძღვანელი, ვისი ყოველდღიური ზრუნვის საგანი, არსებული პრობლემების დაძლევისათვის ერთად, ქვეყნის ზვალინდელი დღე, სამომავლო მიზნები და მისი მიღწევის სტრატეგიაა.

სწორედ აქ ჩნდება ეროვნული ეკონომიკის უმნიშვნელოვანესი გამოწვევა - მეტი აქცენტი განვითარებაზე, სახელმწიფო მენეჯმენტის ეფექტიანობის ამაღლება. საქმე იმაშია, რომ სახელმწიფო მართვის ეფექტიანობა ფასდება სწორედ ისეთი მიზნების დასახვით, თუ რამდენად კონკრეტული, დროში გათვლილი და რეალურ შედეგზე იქნება ორიენტირებული ის, რამდენად წარმატებული იქნება ქვეყანა, გაუთვალისწინებელი და მოულოდნელი ფაქტორების არსებობის მიუხედავად. ამ პოზიციით, არ შეიძლება რომ არ დავეთანხმოთ იმას, რომ „ეროვნული ეკონომიკის განვითარების ტენდენციების შესწავლის აუცილებლობა განპირობებულია მისი მდგომარეობის ობიექტურად შეფასებისა და სამომავლო მიმართულებების განსაზღვრისათვის. საკითხის აქტუალობას ზრდის ისიც, რომ ცვლილებების დაჩქარებული პროცესი მოითხოვს არგუმენტირებულ პასუხებს არა ერთ ჩვენთვის სასიცოცხლოდ მნიშვნელოვან გამოწვევაზე (ბეჟანიძე 2017: 3)

ფაქტობრივად, ანალოგიური მდგომარეობა ბევრ ეროვნულ ბიზნესშიც. როგორც წესი, კომპანია არის მწარმოებლური თუ მასში კეთდება ისეთი პროდუქცია (მომსახურება), რომელიც კარგად იყიდება და ეს ყველაფერი ზრდის კომპანიის შემოსავლებს. მართალია მწარმოებლურობა, ზოგადად, ეს არის იმის საზომი, თუ რამდენად კარგადაა შესრულებული მომხმარებელი, რამდენად ყაირათიანად გამოიყენება რესურსები და რამდენად ეფექტიანია მისი მენეჯმენტი (ჯულაყიძე 2021: 15), ეროვნულ დონეზე, აღნიშნული სამი მდგენელის (მომხმარებელზე ორიენტირება, რესურსთა ყაირათიანობა და მენეჯმენტის ეფექტიანობა) გარდა კომპანიათა მწარმოებლურობის ზრდა უამრავ სხვა გამოწვევას მოიცავს. მათ შორის, ობიექტური მიზეზების (მაგ., ჩვენთან ტექნოლოგიები არაა იმდენად განვითარებული, რომ მისი გამოყენებით შექმნილმა პროდუქციამ ფასით, ხარისხით და სხვა საკონკურენტო მახასიათებლებით განვითარებული ქვეყნების კომპანიათა ანალოგებს აჯობოს) გვერდით, არც თუ ისე მცირეა სუბიექტური ფაქტორებიც, რომელთა შორის უმნიშვნელოვანესია - ოპერაციული პროცესების პროექტირების მეცნიერული პრინციპების სრული უგულებელყოფა და სტრატეგიული აზროვნების დეფიციტი. კონკრეტულად კი მენეჯერთა დაბალი კომპეტენცია ოპერაციულ სისტემებსა და პროცესებში მოსალოდნელი ცვლილებების მართვისა და საერთოდ, კომპანიის სტრატეგიული განვითარების საკითხებში.

პირველი ნაბიჯები, რაც აუცილებლად უნდა გადაიდგას არის კომპანიის ფუნქციონირების უნარის გაძლიერება შედარებით უფრო გრძელვადიან პერსპექტივაში. სხვა სიტყვებით თუ ვიტყვით, საჭიროა მეტი ყურადღება ესოდენ არამდგრად გარემოზე, რათა მოსალოდნელ ცვლილებებზე მოხდეს სწრაფი და ადეკვატური რეაგირება. თუმცა, როგორც ცნობილია, მომხმარებელთა მოთხოვნებზე სწორი ორიენტირება, როგორც კომპანიის მენეჯმენტის უპირველესი გამოწვევა, პირველ რიგში, დამოკიდებულია კომპანიის ამჟამინდელ მდგომარეობაზე - მისი ეკონომიკური პოტენციალის სწორ შეფასებაზე. მხოლოდ მათთან შესაბამისობაში უნდა მოხდეს იმის გადაწყვეტა, თუ სად და როგორ უნდა განთავსდეს რესურსები, რომლებიც ერთობლივად განსაზღვრავენ იმას, თუ რა გზითაა შესაძლებელი წარმატების მიღწევა არსებულ გარემოში (ჯულაყიძე 2023: 8). შესაბამისად, სწორედ ასეთი პროცესების წარმატებული მართვა გვევლინება როგორც ეროვნული მენეჯმენტის განვითარების უმნიშვნელოვანეს გამოწვევად, ასევე ჩვენი ნაწარმის მსოფლიო ბაზარზე გატანის დასაძლევ უმთავრეს ამოცანად. ამასვე ადასტურებს საქართველოს სოციალურ-ეკონომიკური განვითარების სტრატეგია. კერძოდ, ამ მიზნით ჩატარებული ანალიზის საფუძველზე ეკონომიკის განვითარების ხელშეშლელ კრიტიკულ პრობლემათა შორის გამოიკვეთა კერძო სექტორის დაბალი კონკურენტუნარიანობა, არასათანადოდ განვითარებული ადამიანური კაპიტალი და ფინანსებზე შეზღუდული ხელმისაწვდომობა (საქართველოს... 2020: 7)

იმისათვის, რომ მივიღოთ წარმატებული სტრატეგიული გადაწყვეტილება, აუცილებელია მისი ობიექტური მდგენელები (მიზანი, სიტუაცია, პრობლემა, შესაძლებლობა, ალტერნატივები, მოსალოდნელი სცენარი და განვითარების სიუჟეტი, რისკი, გაურკვევლობა და სხვა ნებასა და ცნობიერებაზე დამოუკიდებელი ფაქტორებიც კი) მივიღოთ ადეკვატურად, რაშიც მნიშვნელოვანი როლი გააჩნია მენეჯერის ცოდნას, უნარებს, ჩვევებს, გამოცდილებას, მის პროფესიულ მახასიათებლებსა და პიროვნულ თვისებებს. სხვა სიტყვებით რომ ვთქვათ, გადაწყვეტილების წარმატება სისხლხორცეულადაა დამოკიდებულია მენეჯერის სურვილსა და კომპეტენციაზე. თუმცა, თითოეულ ადამიანს, მათ შორის მენეჯერსაც, ღირებულებათა საკუთარი სისტემა აქვს, რომელიც განსაზღვრავს მის მოქმედებას და გავლენას ახდენს მიღებულ გადაწყვეტილებაზე.

იმ მიზნით, თუ რა დონეზეა სტრატეგიული აზროვნების უნარი თანამედროვე მენეჯერებში ჩვენს მიერ, ქ. ქუთაისსა და მის შემოგარენში, ჩატარდა ანკეტური გამოკითხვა მცირე საწარმოთა მესაკუთრეებსა და მენეჯერებში, მათი ბიზნესის განვითარების პერსპექტივებზე. გამოკითხული იყო 200-მდე რესპოდენტი. კითხვაზე - გაქვთ თუ

არა სურვილი გააფართოთ თქვენი ბიზნესი, ანუ მიიღოთ მეტი შემოსავალი, დადებითი პასუხი გასცა რესპოდენტთა 99%-მა. ამასთან, კითხვაზე - რა გიშლით ხელს გააფართოთ თქვენი ბიზნესი, გამოკითხულთა უდიდესმა უმრავლესობამ (72%) უპასუხა, რომ მისთვის ხელშემშლელია - „ფინანსური რესურსების უკმარისობა“; აღნიშნული კითხვის სავარაუდო პასუხებს შორის მეორე ადგილი დაიკავა „დაქირავებული პერსონალის დაბალმა კვალიფიკაციამ“ (რესპოდენტთა 13%), მესამე კი - „მოძველებულმა ტექნოლოგიამ“ (6%). ხოლო, ისეთმა ფაქტორმა, როგორიცაა „დაბალი კომპეტენცია მენეჯმენტში (გამოუცდებლობა, არასაკმარისი ცოდნა, სისუსტე პროგნოზირებაში)“ კი - მხოლოდ 4%; სხვა მიზეზები - 5%. მაშინ როდესაც ისეთ კითხვაზე, როგორიც იყო - „რა მოგებას მოიტანს თქვენი საბრუნავი კაპიტალის გაორმაგება?“ იგივე რესპოდენტთა 42% ასახელებს, რომ საბრუნავ კაპიტალში ინვესტირებული ყოველი ლარის უკუგება წლის ბოლოს იქნება არა ნაკლებ 50%; 37% ამბობს - 100%-მდე, ხოლო 5% - 100%-ზე მეტსაც.

ამრიგად, თუ რესპოდენტთა 99%-ს სურვილი აქვთ განავითაროს მისი ბიზნესი, თუ მათი უდიდესი უმრავლესობა (84%) თვლის, რომ მის საქმიანობაში

ინვესტირებული ყოველი ლარი იძლება სულ მცირე 50%-იან უკუგებას მაინც, რომელიც ბევრად აღემატება სადღეისო საბანკო კრედიტის პროცენტს, შეიძლება გაკეთდეს დასკვნა, რომ დღეს ეროვნული ბიზნესის განვითარების პრობლემა - მენეჯმენტის დეფიციტია.

გამოყენებული ლიტერატურა:

1. ბეჟანიძე ნ. 2017: ეროვნული ეკონომიკის განვითარების ტენდენციები და გამოწვევები. დისერტაცია ბიზნესის ადმინისტრირების დოქტორის აკადემიური ხარისხის მოსაპოვებლად, ბათუმი, 190 გვ. https://www.bsu.edu.ge/text_files/ge_file_8499_1.pdf
2. საქართველოს... 2020: საქართველოს სოციალურ-ეკონომიკური განვითარების სტრატეგია, 110 გვ. https://www.gov.ge/files/382_42949_233871_400-1.pdf
3. ჯულაყიძე ე. 2021: ოპერაციათა მენეჯმენტი, ქუთაისი, ანსუ, 320 გვ.
4. ჯულაყიძე ე. 2023: სტრატეგიული მენეჯმენტი, ქუთაისი, ანსუ, 320 გვ.